

客
座
贅
語

客座贅語卷八目錄

名公像

科舉事例

儒學

皇城

吳媼

螺磯

廊生

飲虹先生

司馬家婢

黃督學

仕路窄

賞鑒入則

藏書

督學察院

元御史臺

金陵垣局

王司寇

陳侍御

割肝

秋宇先生著述

黃鰲南父子

文臣賜第

修志

尹山人

陳廣平

孔復

四羽士

白野先生

侍御無茶具

耳環投水

金陵學校

祠先賢

青溪先賢祠

建康俗尚

十一則

南都詞林

訢慕編

許少張

吳八絕

鄉正

劉千戶

周汝衡

客座贅語卷八目錄終

客座贅語卷八

大市

名公像

倪文僖公與子文毅公像俱方面大耳豐頤頰微髭
鬚文毅尤爲肥碩聞其曾孫翰儒言腰帶圍可容中
人四軀也公無子里中傳文僖禱北岳其夫人姚夢
岳神指捧香合童子曰以爲爾子孕而生公故名岳
言公隱官公會生子祝枝山野記亦言文毅願躬廣

頤美如冠玉。腹大十圍。體有四乳。云而陳中丞人物志言文僖雙目如電。體有四乳。祝或誤也。

王襄敏公廣額豐頤。而骨氣峻拔。有威重。印堂中直紋五條。右頤有一黑子。音吐如鍾。

都督劉公璽面巉削。無渥顏。聳肩如寒士。

楊水田公成鐵面劍眉。凜不可犯。

陳太史公沂軀不甚長。神采朗秀。眸子可照。

邵僉憲公清貌古神秀。其聲清遠。

徐子仁公霖廣面長耳。美鬚髯。體貌偉異。老而豐潤。

行步如飛稱曰髯仙

謝野全公承舉美髯髯行九人稱曰髯九

許奉常公穀長頭面白皙而圓巨鼻微髯雙眼如碧
色八十時狀如世畫老子

王吏部公鑒面白皙骨峻嶒清峭兩眉如劍直豎微
髯鬚望之義氣凜然

殷宗伯公邁面圓黃白色微髯清靜之意可見

姚太守公汝循身可中人面上員下稍銳白皙小有
鬚向人多笑容

客居叢書
卷一
余司成公孟麟目小而圓骨法清古耳高於眉下微
銳

沈侍御公越修幹廣額氣韻高邁

盧苑馬公璧長身面如之黃色古而硬老矣多皺紋
王太守公可大修軀銳首面長尺白晳眉目疏朗微
髭鬚手掌如噉血長上短下聲如鍾

吳司寇公自新大軀方面白晳而紅微髭鬚豐頤目
光外現有威重

科舉事例

應天府鄉試

國初自府學生增廣生監生外如未

入流官吏武生醫生軍餘舍人匠之類皆得赴試皆得取中如成化元年章玄應以留守左衛軍餘中第八十七名四年謝崇德以內江人吏中第四十二名十年王鑑以犧牲所軍餘中第二十三名十三年李用文以武學生中第九名十六年喬衍以武學生中第二十四名二十二年陳玉以沂州衛舍人中第十七名楊俊以江陰衛軍中第八十五名弘治五年劉麟以武學生中第七十五名齊貴以管繕所匠中第

九十一名。十一年史良佐以太醫院醫生中第八十五名。十四年陳沂以太醫院醫生中第四十八名。邵鏞以羽林右衛舍餘中第七十一名。劉劑以錦衣衛舍餘中第七十七名。十七年柴虞以驍騎右衛總旗中第八十九名。相傳兩畿額一百三十五名。其五名原爲雜流設也。自嘉靖以後遂不聞有中者。武生間亦考送入場。傳言不與謄錄。果爾則亦非。聖朝立賢無方之意矣。又附學生入試。自弘治八年始。吾鄉顧尚書璘以附學生中第十四名應天試錄之。有附

學生亦自此始也

儒學

府學明德堂後舊是一高阜土隆隆墳起嘉靖初都御史陳鳳梧夷其阜建尊經閣於上未建閣之前府學鄉試中者數多景泰四年開科中式者三百人而應天至二十九人可謂極盛自建閣後通年漸減隆慶以來稀若晨星矣萬曆乙酉丙戌間太常少卿濟南周公繼署府篆公雅善玄文宅經謂儒學之文廟坐乾向巽開巽門而學門居左屬震廟後明德堂堂

後尊經閣高大主事廟門與學門二木皆受乾金之
尅陽宅以門爲口氣生則福尅則禍於是以抽交換
象補泄之法修之於學之坎位起高閣曰青雲樓高
於尊經以泄乾之金氣而以坎水生震巽二木以助
二門之氣又於廟門前樹巨坊與學門之坊並峙以
益震巽之勢於離造聚星亭使震巽二木生火以發
文明之秀又以泮池河水不畜於下手造文德木橋
以止水之流修理甫畢公遷應天巡撫都御史學門
內舊有屏牆戊子冬公下檄拆去之曰去此明年大

居此亡疑矣。己丑焦公果應其占。庚寅冬公遷
南戶。侍面語予曰：修學而一大魁。余未敢言功也。占
當出三元坊中樞字亭上星字篆文區之三口星上
之三圖皆寓三元之象。君其識之。乙未戊戌朱公與
余相繼登第。人益以公之術爲神。頃年有議修學者
大京兆黃公博謀於衆。余謂只宜循公之制。不可輕
改。其發科之多少。蓋亦歲運利鈍所致。不拘何宅皆
有之。惟其宅本吉則宜靜聽以待吉之自會。年年變
遷。科科修改。斷無此理。時議者皆以余言爲然。京學

志載公修學事余特爲詳其所以告學者

皇城

萬曆中少宰李公廷機曾議修大內承天門樓余座師少宗伯葉公向高署工部事以質於大司馬郝公杰郝公以會典成化十六年有南京皇城内宮殿不許重修之例答之遂止而不行然余查萬曆初承天門損壞部題准修理工部主事黃正色等有勞人役俱叙功則皇城自舊例城牆之外亦有修理之事矣竊意唐重東都宋重西京僅置留守與今日南京

奉陵廟備百官者殊例。官門任其頽敝恐亦非國
家重根本意也。

吳媪

王丹丘翁言吳交石尚書有姊老而寡居尚書之家
媪能詩文一時卿大夫多與之酬咏或來詣尚書者
值其它出輒請媪見與論議問近日有何篇什供茗
而去當時士大夫風俗樸質如此曾不以爲異也尚
書友愛甚篤摯爲南御史大夫所居在北門橋南嘗
於橋上遇其兄踽踽步行卽下輿扶攜而歸里中老

成人至今談之以爲盛德事而國史實錄亦謂公居家待昆弟有恩人皆稱之

螺磯

蕪湖江有螺磯磯有廟所祀者劉先主之孫夫人江上漁人言螺蓋老黿之類也癸丑某孝廉以訪友寓鳩茲偶游廟入寢殿熟觀其像賦詩有調謔語歸卧旅舍詰朝晝漏下數十刻不啟戶家人挾扉視之則死於榻矣陰精流輪霑汗席上疑爲物所魘而稱入祠廟者宜敬而遠之毋得瞻視謔浪觀

此與三水小牘所紀魯山縣女靈廟夏秋順事頗相
類。彼爲神所招。以友人正言責神而罷。而孝廉乃懼
其禍可異也。

鄺生

鄺典者前京兆鄺公埜之裔也。爲府學諸生。齒且宿
矣。訓童子於大中橋尹氏夜臥館中有羣盜猝至扣
主人門不啟。捽鄺令呼以入。鄺曰不可。盜以刃迫之。
生大言曰。吾受主人請教。若子今乃爲若輩呼。其門
以劫之。此豈復有人理邪。汝殺則殺吾口不可開也。

盜不得已掠生衣被而縛之。至天明主人開門乃解其縛。生素慙直。今段遂能剛正。乃爾若此生者。余意學使宜旌異之以厲積俗。

飲虹先生

李師文熙參議昊之子也。舉進士爲南御史。以上疏請誅劉瑾等。逮下詔獄。廷杖三十。放歸。瑾深銜之。踰年又以舊牘中有熙名。文致微過。復傳旨於南京。午門杖五十。瑾誅後。家居一十六年。起官郡守。至按察副使。生平方嚴峭直。人以爲難近。顧司寇爲作墓志。

亦微見其意云時輩稱曰飲虹先生況其負氣而善藏也李家在新橋西故號飲虹飲虹舊橋名公與王辣齋徽顧橫涇璫皆號谿刻而王顧之清端李之能諫皆錚錚爲世偉人未易才也

司馬家婢

羊市橋下司馬家西虹侍御之後也萬曆丙午丁未間家有怪拋擲瓦石無虛日後復處處發火焚其門樓三間百計祈禳迄無驗客爲余言其狀余應之曰曾憶風俗通中老嫗事政與此類試語司馬君可密

察家中男女當有人作此狡僞者母信爲鬼物也客
不謂然後一日司馬庶母有一婢忽裙帶中落取火
紙夾於地家人追問之始具吐實向之怪孽皆此婢
之爲也其家遂逐此婢婢去而家安矣語曰少所見
多所怪然哉

黃督學

督學黃公汝金別號翠巖才穎捷異常閱卷一目數
行俱下常以兩門役橫曳之手執筆遇佳者輒用筆
大抹門役亟以酒大白進爲引滿賞之遇惡文卽大

陀擲地上發案日凡所賞識與所黜斥口誦其文之佳惡不遺一字人以爲神試童生日交卷隨問定去取有出院未抵寓者而案已發矣其敏而彊記亦一時之雋也

仕路窄

胡象岡督學曾以事笞一吏吏北人也口稱仕路窄仕路窄求免胡怒盡法決遣之後胡以事被逮詔獄獄中供帳食物畢備胡心訝非獄所宜久之因問執事校尉何以有此荅曰此吾獄吏意也胡心感甚

而不知其人事。解訪此吏詰之曰：君待我厚，不啻骨肉。不曉我何德于君，而以此施我。吏笑曰：公忘之邪？吏卽仕路窄者也。胡大感涕曰：我一時執法笞君，君不恨我。我在獄中，君不思釋憾於我，反厚待我。君誠高義足驅今古。我爲不知人矣。遂與約爲兄弟。厚扶植之。惜此吏忘其名。

賞鑒 八則

賞鑒家以古法書名畫真蹟爲第一。石刻次之。三代之鼎彝尊壘又次之。漢玉杯珖之類又次之。宋之玉

器又次之。審之柴汝官哥定及明之宣審成化審。又次之。永樂審嘉靖審。又次之。留都舊有金靜虛潤。王尚文徽黃美之琳。羅子文鳳。嚴子寅賓。胡懋禮汝嘉。顧清甫源。姚元白淞。司馬西虹泰。朱正伯衣。盛仲交。時泰。姚叙卿。汝循。何仲雅。淳之。或賞鑒。或好事。皆負雋聲。黃與胡多書畫。羅藏法書名畫。金石遺刻。至數千種。何之文。王鼎子父鼎。最爲名器。它數公亦多所藏。近正伯子宗伯元介出。而珍祕盈筥。盡掩前輩。伯時元章之餘風。至是大爲一煽矣。

張擇端清明上河圖舊云在南京一質庫後入魏公家或云在王守溪相公公子處嘉靖中一貴人以重價購送嚴世蕃者乃時人崑山王彪從王公子處私臨本也世蕃喜甚裝潢人湯姓號北川者索賂不得指言其僞世蕃大怒卒以陷貴人云

顧東橋以尚書考滿入京分宜請其宴堂上掛吳小仙月明千里故人來圖公入堂甫揖罷昂首看之大聲曰此摹本也真蹟在吾鄉倪青溪家此畫甚佳當求其真者嚴爲色變

黃美之家有王維着色山水一卷。又王維伏生授書圖一卷。又出數軸皆唐畫也。吳中都玄敬看畢吐舌曰：生平未見。

王維江天霽雪卷爲胡太史懋禮家藏。後其子沒馮開之先生以數十金購之。今尚在其長子驥子家。慕而欲購者懸予其直且數百金矣。胡又有宋榻黃庭經肥本最爲墨帖之冠。今不知在何所。金陵瑣事又記胡有蘭亭記。

姚叙卿藏宋榻淳化閣帖。紙墨光黠如漆而字肥。後

爲其姻家鍾櫛所得。今不知歸何人手。

叙卿有山谷書法華經七卷。紙用澄心堂。光滑如鏡。價至七百元。叙卿沒後。曾有人持以質於余。余睹其字多杳拖疎慢。似非雙井筆也。後竟爲徽賈以重價購去。

王藩幕元耀。故富家子。善畫。家多畜古名畫。至數百軸。李成看碑圖爲最。所刻石帖名栗葉齋帖。皆三吳及金陵人書。

藏書

南都前輩多藏書之富者。司馬侍御泰羅太守鳳胡太史汝嘉尤號充棟。其後人不能守。遂多散軼。司馬家書目尤多。秘牒有東坡先生論語解鈔本四卷。其家數有鬱攸之變。此書亡矣。胡氏牙籤錦軸最爲珍異。而子孫式微。彫落市肆。尤爲人所惋歎。昔人言藏書八厄。水一也。火二也。鼠三也。蠹四也。收貯失所五也。塗抹無忌六也。遭庸妄人改竄七也。爲不肖子鬻賣八也。周吉甫言里中謝家小兒喜聞裂書聲。乳媪日抱至書室。恣裂之以招嘻笑。此當爲藏書九厄。乃

予又聞里中故家子有分書不計部數以爲不均每遇大部兄弟平分各得數冊者有藏書不度篋笥狼籍大米桶中或爲人踐踏者此其厄視梁元帝南唐黃保儀之焚毀又何如哉至若爲庸夫作枕頭爲村店糊壁格爲市肆覆醬甌爲婢嫗夾鞋樣比於前厄差降一等其它如堆積不曉披閱收藏不解護持秘本恡惜不肯流傳新刻差訛不加讐校書之衆厄又有未易枚舉者矣

督學察院

督學察院在南門內舊爲 皇殿 武宗南幸時居
之後改爲學院公解自耿恭簡公後中多妖異近臺
李公寓其中一日月下與夫人閒步堂上忽庭中有
小生員數十人各具巾袍拜舞於階前公與夫人大
驚詫遂移居於會同館自後此院局鑄甚固深藜宿
莽白晝人亦無敢入矣頃年陳公懷雲來乃重爲創
建一掃而更之移居其中遂無它事

元御史臺

弇州先生丞相府志言

太祖初下金陵爲吳王以

元御史臺爲中書省。且云不知御史臺何地。按太祖爲吳王時居今舊內。而元之御史臺金陵志在古御街東青溪之右。正今舊內地。夫旣以南臺建舊內。則所云以爲中書省者恐未的也。作大內後所建丞相府不知在何處。今傳西華門內爲丞相胡惟庸府。亦似未的。蓋自罷丞相。革中書省爲六部。其衙門建置又已大有更張。然不可攷矣。

金陵垣局

鄭端簡公謂金陵形勢。山形散而不聚。江流去而不

留願司寇公亦言登幕府山望大江東去往而不反
爲之太息考之地理家言以巒頭配天星金陵江水
直朝射入乃紫微垣局也古記云中垣已是帝王都
只是垣城氣多泄偶與友人論此謂江水衝射秦淮
西注無應砂關瑣故云余曰此言非也鍾山自青龍
山至墳頭一斷復起側行而向西南而長江自西南
流向東北所謂山逆水逆山真天地自然交會之
應也左邊隨龍之水自方山旋繞向東歷北又折而
向西入江其入江之口左則自橫山發支由雲臺山

觀山獻花岩牛首大小石子堤至雨花臺穿城壕至鳳臺山北臨淮水而右則自鍾山龍廣山雞籠山起謝公墩冶城南止於淮而其外又自馬鞍山起四望山石頭城直繞南過冶城而護於外此兩帶山在外則逆江而上以收江水爲鍾山夾從內則逆鍾山內局之水直奔而南以收淮水垣局之固密如此何得言江水衝射無應砂關瑣邪所爲微有不足者以逆水而結氣力與中穿而落者稍覺有間而緣江翊衛終是單薄不若京師之雄壯而厚大耳卽二公之言

均之未得其真也

王司寇

黃岩王公燝以大京兆遷南刑部侍郎時有土豪王冠者名繡二鷺人也家訾計累巨萬僮奴數千指善納交權貴人權貴人多與往還歲時餽餉燕會門之車馬弗絕也以是冠得恣橫犂牙里閭中人母敢忤視者而冠與方士赤肚子者游其術取初生嬰兒烹噉之或剉其骨以爲粉以是爲延年劑家畜妾十餘人孕將免輒以藥墮而如法餌之它所陰購而餌者

不知幾何人矣。事發權貴人爭爲交關求解免。而公一切距勿聽。卒據法引律凌遲處死。畿民大快之。公自爲京兆所行諸善政大者凡數十。此舉尤爲衆所稱。至今歌誦之。祠公於雨花臺北。公後官至南右都御史。以忤宰臣貴溪公歸。後數十年有陳侍御訪拿鄧玉堂之事。

陳侍御

嘉靖中一監生曰鄧玉堂。不知何許人家。復成橋旁。饒嘗財交結諸貴人。相引爲聲勢。畜虎棍數十人。遇

江上賈舶至者令其黨假充諸色人給事賈人所或
爲縫紉或爲禱祠因得賈人鄉里姓氏與其祖父諸
名字寫僞券牒之曰某年而祖父游金陵負我金若
干賈人多錯愕不能辨其黨又大言恫喝或居間游
說脅持之往往如數償間有識其詐者輒鉤致於家
寘水牢中其人悶絕輒償所負以求解有訟者請託
抑其詞不行或訟者反被重刑而去南都莫可如何
御史荊州見吾陳公大賓至稔知其惡狀欲除之恐
其多與援乃先往投刺致其報謁比人卽令人褫巾

服摔於庭具刑嚴鞫之俯首伏訊諸貴人以書爲請者盈門御史悉令投匭中獄旣具隨斃諸杖下所騙人田地房屋與強奪人妻女悉召原主給之至今長老言此猶以爲快其後數十年有李御史訪拿監生孫某之事

割肝

陳中丞金陵人物志於孝子之割肝剖心者得七人焉宋四人曰伊小乙溧水人也剖腹取肝以療母疾劉興祖表孝坊民也剖腹取心以療父疾愈而復作

又割腹取肝襍糜進之史思賢溧陽人也剗心以療
母夏氏女割腹取肝以療母元一人曰顧童子保寧
街人也母病童子年始十六割腹取肝襍粥以進母
母卽甦翌日童子病又一日死明二人曰徐佛保江
陰衛人黃阿回水軍左衛人皆割肝以療母偶與客
語此因掇而記之

秋宇先生著述

胡秋宇先生在翰林日以言忤政府出爲藩參先生
文雅風流不操常律所著小說書數種多奇豔間亦

有閨閣之靡人所不忍言如蘭芽等傳者今皆秘不傳所著女俠韋十一娘傳記程德瑜云云託以詬當事者也傳後傳聞蜀中某官暴卒心疑十一娘婢青霞之爲然某者好詭激飾名陰擠人而奪之位耳云云似有所指其紅線雜劇大勝梁辰魚先生隸書師鍾元常草書師張伯英王常取三人書之在閨帖者從宋榻本手摹刻之較今所傳閨帖神檢殊勝張草中耳字長尺餘與閨帖異今此本在中州

黃螯南父子

東晉黃公甲字首卿。蟄南其晚而自號也。因以名其
集。文多法漢魏及六朝詩。上下今古。頗饒獨詣。高自
矜許。自負不減二陵。所著獨鑒錄評詩文。多前人所
未發。性好忤物。居鄉與往還者。不二三人。晚與廖工
部文光善。數共觴咏。一日廖規其集中有陣毯等語。
宜刪。遂大詬罵。絕之。生四子。皆負雋才。伯祖儒有諫
鳳。嚙覺集。仲戍儒。蟄南最器之。蚤死。有兢辰齋集。叔
方儒。落魄廢其業。亦有陌花軒小集。曲巷詞餘。調世
嘲俗。殊令人解頤也。季復儒爲諸生。見罷有振秀閣。

稿少冶王公嘗稱螫南詩如一領錦繡衣或間以麻
泉語似太過諸子雕龍競爽而名跡不著士論甚爲
惜之

文臣賜第

南都諸文臣得賜第者惟張文僖公憲菴一人而
已其孫僉憲恕草公行實曰公爲侍讀宅舍火疏于
朝曰臣有老母守節孤孀臣有幼弟居常侍母臣無
老母寧有今日母無幼弟曷罄餘年子母相依兄弟
無故叨承近侍自幸遭逢但臣有故廬近遭回祿臣

長與弟莫知所棲誠願乞休用圖終養庶幾屋烏遂
房哺之情危鳥免失巢之嘆疏上英廟惻然勅下
該部因查得太僕寺少卿鄧某有房一所總計若干
餘間坐落聚寶門裏鎮淮橋東見今空閑相應給與
益母暨弟一同居住奉聖旨准他工部知道

修志

陳魯南應京兆白公聘修志東橋先生與之書曰嚴
惟中袁州府志都玄敬黃山圖經李懋卿東莞志邵
國賢許州志各自起意例須取參訂璘收有長安舊

志一本惜不得到家檢奉子仁收天下志甚多想不
乏此作志不難正唯發凡起例爲難耳又本府若上
元之明道書院溧陽之水堰皆厚生正德大事須檢
尋遺蹟就請白公興復蓋百五十六年方遇明公一
舉若又空言無施不獲實惠賢者難遇幸勿失此機
會也又稅糧後當具供億一目查內府及諸司供億
近年與國初多寡之目庶仁者有憫惻之意此不
爲徒作也

尹山人

尹山人者北地產也。元世祖時爲天慶觀道士。懷一牒綴之羊皮。久而尚存。成化間遊南都。髮累歲。忘櫛而自不團結。南都人呼尹蓬頭。云尹得邸寓。輒閉關卧。多者踰月。少亦五六日。而後起居。常不飯。人饋之食。亦不辭。嘗造一民家。會設餉。客麪近四十餘碗。客有戲尹者曰。公能盡噉之乎。曰。能取而噉之。盡無留餘也。孫某者。接山人市中。而賣瓜。擔停焉。某戲問曰。公能盡此一擔瓜乎。曰。能卽買而饋之。噉瓜立盡。無留餘也。戶曹李員外遣僕上病疏。一日辰刻。尹於北

闕端門前見其僕。僕曰：命已下，主人幸得告矣。是日
午餐。尹報李曰：今旦端門前見使者，已得告。後僕還
核問果合。某御史嘗命其隸召尹來。隸曰：昨昔尹登
大中橋觀月，兩鼻垂涕尺許，殆死矣。何召御史笑曰：
此爲鼻柱，非老病也。隸甫行而尹已扣門入，蓋就其
召已也。魏國館尹於居第，嘗偃几晝睡，寤而語魏國
曰：適遊姑蘇洞庭山而返。魏國愕不信，卽出袖中兩
橘畀之一。貴人母敬事尹甚虔，旣而所愛孫未冠，病
瘵，諸醫謝不可治。邀尹力懇之，尹曰：此非藥物所能

爲太夫人遇我厚不得已費我十年功爾令置兩榻
相附昏夜縛少年之足於尹足連屬數重尹鼓氣運
轉喉嚅嚅有聲氣達湧泉貫少年足大熱遍體流汗
如雨注臭穢畢泄詰朝解其縛而少年蘇蘇有生色
別授刀圭藥徐服而愈王文成公試禮闈落第卒業
南雍走從尹遊共寢處百餘日尹喜曰爾大聰明第
本貴介公子筋骨脆難學我我所以入道者危苦堅
耐世人總不堪也爾無長生分其竟以勲業顯哉文
成悵然惋之洛陽有野毛頭張姓者售偽誑世而以

聞見該洽論說雄俊引重薦紳間客抵南都士人慕而爭趨軒車滿戶外尹識其僞也敝衣跣而往謁隨衆稱老爺尊之張方危升高坐側侍者肩摩張傲岸不爲尹禮顧罵曰乞兒辱吾教尹乃據東面坐而謂曰爾欲譚道耶我一任爾問張曰爾乞兒吾又奚問尹因刺之曰爾無我罵爾注悟真篇恐天下訕刺爾者無窮已張曰然則爾曉叅同契與悟真耶尹張目朗音爲抽廣成壺丘延歷度紀樞奧稍論序柱下五千文暨內典華嚴楞伽姬易艮卦彖爻三教渾合之

旨。願。聞。千。百。言。衆。驚。異。悚。聽。皆。俗。耳。所。未。聞。於。是。始。知。山。人。之。辯。慧。不。羣。遠。於。玄。學。也。尹。歸。倚。牆。立。自。掌。其。頰。者。數。十。下。恨。猶。有。勝。心。且。道。非。可。言。言。則。與。道。遠。因。鍵。屏。寢。伏。久。之。終。南。黃。山。人。過。訪。值。尹。睡。正。熟。謂。弟。子。曰。謹。貽。爾。師。青。衣。鞋。我。不。能。待。別。矣。又。數。日。尹。起。問。曰。有。友。人。黃。來。渠。何。言。弟。子。獻。所。贈。尹。曰。是。豫。料。我。將。遙。適。也。無。何。逆。閩。劉。瑾。潛。圖。不。軌。惡。尹。私。有。詆。斥。羅。而。戍。之。關。右。尹。至。戍。所。偶。過。鐵。鶴。觀。騎。一。鶴。凌。空。飛。去。彭。輅。論。曰。稽。康。謂。神。仙。繇。異。稟。受。之。自。

然非積學可企然稟異者鮮不學也又謂養生善調攝上可千餘歲次得數百年夫歲以千計則仙矣彼仙者豈遂彫三光閱萬載無終極之期哉入我明僅傳張邈邈冷子敬尹蓬頭三數公一何寥寂也張冷跡無可稽而南都人能歷歷道尹遺事故論著焉

陳廣平

成化中五府都事卜馬翊者與一方士游方士以小幻術愚其子子心豔之謂爲真仙人也歸亟稱於父都事益信之崇奉有加至得出入卧內都事家多美

方士盡以呪法鉤而淫之。婦人苦其淫毒，訴於縣。縣告官爲理。聞諸朝，朝命檻車適至京。廖於市國文亦載之。獄詞方士爲陳廣平，濟寧人也。挾它妖術，譖不軌。士大夫好與方士游，多冀其傳此法，不自知損德敗名者衆矣。矧又有意外不可言者邪？可爲深戒。

孔復

常檢校信爲余言。廖副憲家居時，好道術。方士孔復者，以燒煉進。廖館於家，久之。語副憲曰：「吾欲一行接

補法。公曷資我。與兼金至。豬市倡家宿。倡婦與之偶。初覺異甚。久之轉畏其淫毒。燒以避之。復攫之。不可得。假母年四十餘矣。素以善淫稱。代與接。久亦趣避。而復固自若也。後倡婦病月餘。假母亦數日不能起。其陽能吹燈滅。且喻火酒至二升餘。布於四肢。赤如血。已復出之。此真所謂采戰逆流邪僻不經之術也。而人多惑之。學其術。求翀舉。噫。世豈有好色之神仙哉。

四羽士

余之所見與耳所聞四羽士皆三十年來游南都與
經紳往還灼灼有名者也。閆蓬頭希言嘗在弇州先
生司馬署中。先生躬爲余言其亡甚異人者。且言初
至猶矯健。後稍弱。且泄瀉。不久蛻於毛百戶家矣。先
生爲其像贊有曰。希言希言。蓬頭蓬頭。吾能臆其名
與貌而不能詰其修。能睹其去而不能測其來由。能
辨其爲散仙而不能定其品與流。我不子從子不我
留。呵呵休休似涉微諷。其後十餘年閆弟子李徹度
者來。李曾止余亡弟周南所。其人瀟灑出塵。所教人

在固後天之氣以養先天而已。人有行之者亦多效。太倉王相國、晉江楊宗伯皆有傳。近年遂不復出游。止於黥歛間。嘗以清虛祕典寄余。大較亦用儔結之事。第與逆流者不同耳。李去未久。又有稱醒神子者。須髮如雪。幹偉而善飲。噉卿大夫多從之游。大司徒萊陽王公獨信以爲真。且曰。渠自言是王威寧。越嘗見威寧畫像。與其人類。意頗崇奉之。而葉宗伯李少宰郝大司馬三公一日同訪之。神樂觀其人。顛倒失度。三公謂是非有道氣象矣。頃年又有所謂彭仙翁。

者何參岳公露極言其非恒人面語余曰據其詞翰
非科甲者不能爲其術大端在積氣而挾有黃白男
女諸奇幻術一時師之者多以靈異自詫不知其果
真有所得否也其人攜數妾而行上河鈕氏嘗迎而
館於家鈕氏婦問其妾仙翁亦交會否答以月必接
接而女郎病如斯而已矣大都此四羽士第其品閭
爲最李次之彭又次之醒神子人言爲社日生當可
信其品最下不足信獨怪士之風靡而走其門者何
也嗟乎以世間心漫求之彼亦漫應之卽旦暮遇猶

千里矣。世間那有揚州鶴哉。

白野先生

殷白野先生邁萬曆初以太僕卿里居。負重名。時江陵當國。有意引先生爲已助。操江都御史王篆江陵心腹也。過先生爲其致款款。且曰。公幸俞此言。暫出少却。當以大司馬推公矣。公默然不應。王要之甚苦。竟不出一語。久之。王曰。坐久矣。我饑。公幸有以啗我。公亦默然。王不懌而去。旣去。其子慶咎公何以不答。且家幸有午殮。何不留啜。而介介如此。公曰。江陵橫。

終當有福。王非端人，何可與作緣也。後江陵推公禮部侍郎，掌南國子監事。會有小故，公遂力辭而罷。

侍御無茶具

邵侍御清爲鹽使者，忤劉瑾，被杖繫追罰米若干石。瑾誅起官，至廣西臬僉，請告歸。家貧無屋，依外氏敝廬以居。督學使者林有孚慕公廉，常造之坐談良久，竟不能具茗椀。林歎息而去。霍尚書韜嘗以所毀菴廟田若干畝餉公，公固辭不受。終身赤貧。嗚呼！真不愧厥名矣。

耳環投水

李公重字元任號遠菴舉正德辛未進士官至江西臬副居官清介去任日誓不將一物歸夫人有耳環一雙任中置也公知之取而投諸水歸里歲餘偶見其僕臥內有朱油床一具問是官下物大怒力命僕載反原任乃已家徒四壁立溧陽史氏延先生教其子歲學俸八十金史念先生貪私以其俸爲置子錢比歲暮進之先生僅受八十金餘揮之不入囊也苗時返犢公可趾美矣呂涇野先生嘗云過白下見副

李公重雖未知其中見其環堵蕭然不覺嘆服甚恨至此數年不得一見此人其爲名流所慕如此

金陵學校

漢揚州刺史何武所至先卽學官見諸生

光武時李忠爲丹陽郡太守起學校習禮容春秋鄉飲選用明經

吳景帝永安元年詔置學官首立五經博士

晉建武初始立太學因王導戴邈之言

咸康二年立太學於秦淮水南

太元十年尚書令謝石復請興國學於太廟之南。宋元嘉十五年立儒學於北郊。命雷次宗居之。明年又命丹陽尹何尚之立玄學。著作郎何承天立史學。司徒參軍謝玄立文學。儒學在鍾山之麓。草堂是也。玄學在雞籠山東。文學在耆閣寺側。二十七年罷國子學。而其地猶名故學。齊竟陵王良開西邸。延才俊。遂命爲士林館。在雞籠山。梁大同六年於臺城立士林館。延集學者。南唐置學官。濱秦淮開國子監。

宋天聖七年丞相張士遜出爲太守奏建府學

景祐中陳執中徙學於府治之東南古浮橋之東北
紹興九年葉夢得因學兵燬更造

元集慶路學規模率倣前制

國初改國子學後建國學於覆舟雞鳴兩山之陽乃
以此爲應天府儒學

祠先賢

淳祐十年吳淵列祠先賢於府學與祀者二十六人

濂溪先生周文公

敦頤

明道先生程純公

顥

伊川先生程正公頤

晦庵先生朱文公熹

右四先生在大成殿東

丞相范忠宣公純仁

丞相呂文穆公蒙正

一拂先生鄭介公俠

通判楊忠襄公邦乂

丞相周文忠公必大

南軒先生張宣公栻

勉齋先生黃文肅公勉

壹是先生吳正肅公柔勝

西山先生真文忠公德秀

右九位在大成殿西

太師魯國顏公真卿

丞相李文定公光

中書傳獻簡公

珪

少保馬忠肅公

光祖

樞密包孝肅公

拯

尚書張忠定公

詠

右六位在明德堂東

丞相趙忠簡公

鼎

丞相張忠獻公

浚

丞相呂忠穆公

頤浩

丞相陳正獻公

康伯

尚書黃公

度

樞密忠肅劉公

珙

樞密丘公

密

右七位在明德堂西

青溪先賢祠

宋馬光祖建先賢祠堂一所在府學之東明道書院之西青溪之上自周漢而下與祀者四十一人各有讚攷金陵志祀者皆於此土有涉非泛然而已或生於斯或仕於斯或居且游於斯後閩士陳宗上制置姚希得書求增入蘇文忠子瞻且備列公游金陵賦咏之事謂位次當在程純公之下祠國初已毀萬曆丁未南少宰葉公因祠部郎葛君重建祠於普德寺後山而不聞其增祀文忠也其四十一人遺跡略志於後

吳太伯初逃句曲山中

嚴光結廬漂水縣

張昭宅在長干道北有張侯橋

是儀字子禽宅在西明門

周處子隱臺在虎苑寺

陶侃事在石城

謝安宅在烏衣巷

王羲之事見冶城樓

晉少宗開館在龍山

范蠡築越城石長于里

諸葛亮往來說吳又勸孫權定都

周瑜周郎橋在句容縣

王祥墓在江寧化城寺北

王導宅在烏衣巷

卞壺廟在冶城南

謝玄別墅在康樂坊廡在新橋西

吳隱之茅屋故基在城東

劉瓛居宣橋

陶弘景 居茅山

顏真卿 昇州刺史其家墓多在江寧

孟郊 溧陽尉

潘佑 兄江南錄

張詠 知昇州再任

包拯 知江寧府

程顥 上元主簿

楊時 嘗家溧陽

張浚 留守靜旨

蕭統 讀書臺在定林寺後

李白 往來金陵具載本集

李建勲 號鍾山翁

曹彬 昇州行營統帥

李及 昇州觀察推官

范純仁 江東運判

鄭俠 清涼寺有祠

李光 宣撫使

楊邦乂 知溧陽縣遷通判

虞允文

督府參謀

張栻

督府機宜文字

朱熹

江東韓運

吳柔勝

生於金陵

真德秀

江東運使

建康俗尚

隋志曰丹陽舊京所在人物繁盛小人率多商賈君子資於官祿市廛列肆埒于二京人襍五方俗頗相類

顏氏家訓曰江東婦女畧無交游婚姻之家或十數年間未相識者惟以信命贈遺致殷勤焉

杜佑通典曰江寧古揚州地永嘉之後帝室東遷本
冠避難多所萃止藝文儒術斯之爲盛今雖閭閻賤
隸處力役之際吟咏不輟蓋因顏謝徐庾之風扇焉
沈立金陵記云其人士習王謝之遺風以文章取功
名者甚衆

祥符圖經曰君子勤禮恭謹小人盡力耕植性好文
學音辭清舉

顏介曰南方水土柔和其音清舉而切天下之能言
唯金陵與洛下耳

楊萬里曰金陵六朝之故國也有孫仲謀宋武之遺烈故其俗教且美有王茂弘謝安石之餘風故其士清以邁有鍾山石城之形勝長江秦淮之天險故地大而才傑

游九言曰每愛金陵士風質厚尚氣前年攝行倖事日受訴牒不過百餘較劇郡纔十一爾爲吏爲兵者頗知自愛少健狡之風工商負販亦罕聞巧僞

戚氏曰金陵山川渾深土壤平厚在宋建炎中絕滅境爲墟來居者多汴洛力能遠遷鉅族仕家視東晉

至此又爲一變歲時禮節飲食市井負街謳歌尚傳
京城故事人物敦重質直罕黷巧浮僞庶民尚氣能
勞力田遠賈舊稱陪都大鎮今清晏之官內外通選
人品倫鑒居東南先士重廉恥不競榮進氣習大率
有近中原地當淮浙之衝談者謂有浙之華而不澆
淮之淳而雅于斯得之矣

顧華玉尚書近言云吾鄉大都也生人之性亢朗冲
夷重義而薄利風俗之美喜文藝而厭凡鄙得天地
之靈懿焉其敎也乃或樂虛淫習侈豫無麻衣蟋蟀

之風士緣以喪節也

焦弱侯太史云金陵六代舊都文獻之淵藪也高
皇帝奠鼎于斯其顯謨大烈紀於石渠天祿彬彬備
矣以故寰宇推爲與區士林重其清議及夫餘風細
故昔稱游麗辯論彈射臧否剖析豪釐擘肌分理者
至今猶然

南都詞林

楊勉永樂二年庶吉士主事官至刑部右侍郎張益
永樂十三年庶吉士中書舍人官至侍讀學士參機

務劉江永樂十六年一甲二名編修乞便養改九江府學教授官至長史倪謙正統四年一甲三名官至南禮部尚書金紳景泰五年庶吉士給事中官至刑部右侍郎倪岳天順八年庶吉士編修官至吏部尚書倪阜成化二十三年庶吉士主事官至布政使王韋弘治十八年庶吉士主事官至太僕寺少卿景陽正德三年一甲二名官至中允陳沂正德九年庶吉士編修官至行太僕寺卿那一鳳嘉靖二十年一甲三名官至參政張鐸嘉靖二十二年庶吉士御史官至

俞事胡汝嘉嘉靖三十二年庶吉士編修官至副使
余孟麟萬曆二年一甲二名官至南國子監祭酒焦
竑萬曆十七年一甲一名官修撰朱之蕃萬曆二十
三年一甲一名官任南禮部右侍郎余小子起元萬
曆二十六年一甲三名今任少詹事兼侍讀學士以
上共十七人又句容劉濬永樂十年庶吉士官御史
曹義永樂十三年庶吉士編修官至南吏部尚書六
合鄭猷永樂十三年庶吉士官檢討江浦張瑄景泰
二年庶吉士官尚書莊景成化二年庶吉士官檢討官

至南吏部郎中石淮成化二年庶吉士主事官至提
學僉事溧陽潘楷成化二十三年庶吉士御史官至
布政使溧水馬一龍嘉靖二十六年庶吉士檢討官
至南子監司業溧陽史繼宸萬曆五年庶吉士給事
中官至布政使句容孔貞時萬曆四十一年庶吉士
以上共十人總一府共二十七人居鼎甲者八人陳
中丞人物志載丁璿上元人舉進士改翰林庶吉士
今攷翰苑題名錄無璿名璿官至右副都御史舊京
詞林志又載永樂二年庶吉士有王仲壽江寧人又

永樂戊戌習譯庶吉士有莊約上元人

訢慕編

陳參岳鳳作訢慕編爲梁官保材張御史大夫琮周
宮保金顧司寇璘璘子嶼羅太守鳳金太守賢子大
車附陳太僕沂景中允賜王太僕韋子逢元附邵僉
憲清劉督府璽謝野全先生承舉任德徐九峯霖劉
雨黃琳琳弟珍珍子炎杲許攝泉陞李鶴塘景星周
吳齋文銓又續亡二人王少保以旂顧憲副璫周乃
隱於醫者陳序曰如前十數公或以勛業著或以德

學稱或以節槩流聲。或以風雅侈譽。皆玄黃之精英。而鄉國之黼藻也。一藝之士如周子若而人。今也吾見亦罕矣。庸可使其無傳乎。嘉靖辛亥秋七月望書於大都逆旅。

許少張

姑蘇劉翰林珉嘗在清涼寺讀書。邀盛仲交同沈重巽上環翠閣。劉以佯狂張藏。虺爲韻。苦仲交。仲交走筆書壁。押張字云。任俠那誇許少張。事頗隱僻。按陶隱居許長史舊館壇碑云。長史汝南平輿人。漢靈帝

中平二年六世祖光字少張避許相諛倭乃東過江
居丹陽句容都鄉之吉陽里後仕吳爲光祿勳所言
許相正指曹瞞耳諛倭似諛倭之誤此與仲交所用
微異又宋有許安世著許少張集一卷

吳八絕

孫吳時吳有八絕吳範以治歷數知風氣聞劉惔以
明天官達占數顯趙達以治九宮一算之術應機立
成對問若神計飛蝗射隱伏無不中效皇象幼工書
時有張子並陳梁甫能書甫恨述並恨峻象斟酌其

間甚得其妙。嚴武字子卿。圍棋莫與爲輩。宋壽占夢
十不失一。曹不興善畫。孤城鄭姬能相人。又晉陽秋
有葛衡達天官。抱朴子言有葛仙公。多道術。景帝時
有巫覡能視鬼。葛洪神仙傳言有介象。多方術。一代
初興。奇人快士。風赴雲集。以供役使。故不可謂其怪
迂也。我國初周顛仙。冷謙鐵冠道人。張三丰之類
亦然。

鄉正

顧司寇近言鄉正篇曰。太宗伯童公軒。擇地而蹈。擇

言而言吐辭濡翰必軌其方慎哉愿乎參議王公
事君以忠行已以義亢而不徇困而彌貞矯矯乎彊
毅君子矣太僕李公應禎氣直行廉義有不合一介
不以取與人翰墨之精譬諸銛戟利劍掉以淮陰之
雄其鋒莫當矣其介且有文者乎通判陳公鋼愷悌
宜民死無餘藏而故民懷思冉冉有桐鄉之風蓋古
之遺愛也

劉千戶

劉千戶蒼字伯春入武學能讀孫吳諸家兵法務行

長厚僚佐有支軍糧誤浮本數當抵法君適不與乃
自補署文案事白人異其故公曰某素謹且吾兒方
稱奉法吏人信爲誤若諸君何以自白又嘗得遺牒
於途乃遠方人入糧戶部所給者公往候其處三日
一人號頻至且曰某家坐此死獄者五六人矣復失
柰何其人出金帛謝不受子麟官尚書

周汝衡

周文銓字汝衡蘇人也徙家金陵以醫行汝衡資絕
人見世工率習近世脉訣方書諸雜說不究本原卽

見病莫知從來一切揣度施治乃悉屏去衆習書獨
取內經本草難經等書徹晝夜讀務窮精奧初爲小
兒醫時有楊茂者學古大方脉汝衡相與往來講究
益歷閭閻茂死病家爭迎汝衡凡汝衡至診病立方
多與衆殊指知斯道深永或失手則殺人重於用藥
遇有故輒不赴召及赴召或見病疑輒不投藥人不
測所操或謂其難致汝衡終弗言常語東橋先生曰
醫者聖人之學也非盛德莫能操其慮非明哲莫能
通其說是故士有能知草木金石昆蟲之藥辨類審

性析經致能弗乖其宜。弗亂其忌。是謂知物。知物者。巧士有能。知人之疾病。淫於四氣。薄於五臟。動於七情。見外知內。按微知巨。占始知終。執生知死。由是以審。施湯液醪醴鍼砭按摩之治。是謂知證。知證者。工士有能。知臟腑之所表裏。經絡之所離會。榮衛之所彌勝。命脉之所消息。選物設方。制於未形。體微發處。決於衆惑。是謂知生。知生者。聖士有能。知天地之情。陰陽之本。變化之因。死生之故。立教布法。使人專氣含精。以握樞機。汰穢葆真。以固根柢。疾疢不作。神乃

自生是謂知化知化者神夫神聖者上智之能事未
易冀及工巧之道術學之所造也醫不臻此不足以
名業嗚呼此其指微矣世寥寥誰能解者

客座贅語卷八終